



KOALICIJA ZA BORBU PROTIV GOVORA MRŽNJE I ZLOČINA IZ MRŽNJE  
КОАЛИЦИЈА ЗА БОРБУ ПРОТИВ ГОВОРА МРЖЊЕ И ЗЛОЧИНА ИЗ МРЖЊЕ  
COALITION FOR COMBAT AGAINST HATE SPEECH AND HATE CRIME

## **Saopćenje za javnost Koalicije za borbu protiv govora mržnje i zločina iz mržnje povodom nedavnih zločina iz mržnje i izazivanja nacionalne, rasne ili verske mržnje, razdora ili netrpeljivosti u Republici Srpskoj**

**Koalicija za borbu protiv govora mržnje i zločina iz mržnje strogo osuđuje nedavni fizički napad na povratnika, Nezira Dardagana, predsjednika zborničkog džematskog odbora Islamske zajednice, te nedavne događaje u Bratuncu povodom proslave pravoslavnog Praznika svetog Makivija.**

Koalicija za borbu protiv govora mržnje i zločina iz mržnje napominje da je fizički napad na Nezira Dardagana uslijedio nakom verbalnog vrijeđanja na nacionalnoj i vjerskoj osnovi grupe građana\_ki, te da je do napada došlo rano ujutro, u 4:45 h, 08.08.2013., kada je Dardagan sa više drugih građana\_ki, pošao na jutarnju molitvu povodom praznika Ramazanskog bajrama, kao i da pomenute okolnosti upućuju da se ovaj fizički napad može okvalifikovati kao zločin počinjen iz mržnje.

Također, Koalicija želi osuditi i događaj koji se odigrao 14. avgusta 2013. godine, u Bratuncu, mjestu koje se nalazi samo desetak kilometara od Srebrenice, kada na vašaru prilikom proslave Praznika svetog Makivija, unatoč prisustvu policije, niko nije reagovao, niti pokušao zaustaviti pjevanje pjesama koje veličaju i proslavljaju ratne zločine počinjene u prošlom ratu u ovom kraju. Pomenutom događaju, prisustvovao je veliki broj građana\_ki koji\_e su tom prilikom uzeli učešća u javnom pozivanju na nove zločine. Nažalost, ova dešavanja su prošla neopaženo od opštinskih vlasti, ali i drugih nadležnih organa u Republici Srpskoj.

Članice Koalicije za borbu protiv govora mržnje i zločina iz mržnje žele naglasiti da Republika Srpska treba odlučno primjenjivati postojeće pravne norme, koje su sastavni dio krivičnog zakonodavstva, u cilju pružanja adekvatne zaštite ljudskih prava svih svojih građana\_ki, te pozivaju policiju i pravosuđe Republike Srpske da adekvatno reaguju, procesuiraju i osude ovakve i slične slučajeve, te profesionalnim obavljanjem svog posla sankcionišu svako krivično djelo **zločina iz mržnje i izazivanja nacionalne, rasne ili verske mržnje, razdora ili netrpeljivosti** koji su kao takvi definisani i Krivičnim zakonom Republike Srpske.

Članice Koalicije izražavaju bojazan da neosuđivanje pomenutih događaja neće doprinijeti procesu pomirenja u BiH, te žele naglasiti da nekažnjavanje govora mržnje i zločina počinjenih iz mržnje, kao krivičnih djela koje u svojoj osnovi imaju podrijetlo jednakosti i ravnopravnosti građana i marginaliziranje pojedinačnih društvenih grupa, predstavljaju prijetnju miru i stabilnosti u BiH.



KOALICIJA ZA BORBU PROTIV GOVORA MRŽNJE I ZLOČINA IZ MRŽNJE  
КОАЛИЦИЈА ЗА БОРБУ ПРОТИВ ГОВОРА МРЖЊЕ И ЗЛОЧИНА ИЗ МРЖЊЕ  
COALITION FOR COMBAT AGAINST HATE SPEECH AND HATE CRIME

Ovim putem javno pozivamo sve odgovorne na preduzimanje svih potrebnih mjera kako bi onemogućili da svako buduće nasilje i pozivanje na nasilje postanu sastavni dio javnog i društvenog života Bosne i Hercegovine, te adekvatnim sankcionisanjem odgovornih i osudom ovakvih slučajeva poslali poruku da Republika Srpska neće dozvoliti teroriziranje manjine od strane većinskih društvenih grupa i podrivanje njenog ustavnog poretka i jednakosti njenih građana\_ki, kao i gruba kršenje Krivičnog zakona RS, te da će nadležne institucije Republike Srpske osigurati adekvatnu zaštitu svim svojim građanima\_kama od kršenja njihovih osnovnih ljudska prava.

Koalicija za brobu protiv govora mržnje i zločina iz mržnje, osnovana je u januaru 2013. godine, uz podršku OSCE-a i Civil Right Defendersa, a čine je Asocijacija za demokrtske inicijative, Inicijativa mladih za ljudska prava, Mediacentar Sarajevo, Sarajevski otvoreni centar, BH novinari, Vijeće za štampu u Bosni i Hercegovini i Fondacija CURE. Glavni cilj formiranja Koalicije jeste zagovaranje za adekvatnu regulaciju govora mržnje i zločina iz mržnje u krivičnom zakonodavstvu oba entiteta i Brčko distrikta Bosne i Hercegovine, te harmonizaciju krivičnog zakonodavstva.

**Koalicija za borbu protiv govora mržnje i zločina iz mržnje**